

游窪泉記

劉楚

漳洲之東有流泉焉其源發乎桃花洞之奧出洞口與鄧家源水合而西行紆徐曲折循古株山之麓以達於漳洲上下六七里許率負山而挾田田盤迴兩山間至漳洲始衍夷而平曠疇壟彌望水下激成崖深行地中故田若益高水若益下耕者俯臨之不能致昔有備旱潦者築巨堰塌其衝以消息之堰高與田等隱若東峽春雨時止水灑灑交田面截奔蓄深溢流下飛久之浮壤漂滌地骨出露陂陀盤辟輪囷突兀中流兩崖直堰之下其廣可數畝而土礫殺礪若棄地然每秋高氣澄漲落潦縮泉一線穿襲土絡間日刮月削遞成盤窟深者若井淺者若

道藏輯要

天下名山記
江西窪泉劉

三

軫集三
卷三

白圓者若盤杆虛者如鼎鑊旋轉如碾渦欹瀉若甌甌鏗然有聲悠然下赴乃交注上積之兩腋積墮而旁垂穹窿搜抉蜷若象鼻獨盤屹而中峙其左則抵突而漫頂珠跳雪濺煦沫騰沸其右則投間懸絕若銀綆瓊刀飄風射虛以合注於磧下之大窪而聚焉廣可三尺餘從五尺深如從之數而加二腹洞吻喏若欲甕然四圍周環高擬壁壘其土堅密近於石表黎黑而中黃黃蠟黎鐵塗以青蒼雜以駢赤赤者朱殷白者凝脂湍激波撞下空旁隙爲燕巢爲蜂戶爲蟻蛭爲羊胃爲穀紋爲錦綺爲金鎖甲爲鍾乳滑潤磊砢嵌巖燦爛不可名狀其底瑩徹絕泥滓白沙錦石填壅其中水旋於窪若走石赴抹然乃折而蛇行

淳泐爲坎者再又西北行循洲之陰以出黃塘之右蓋由是趨
白家橋歷石岡之陽遂北入章江矣泉初未有奇之者歲丁未
六月夏予弟野始與其客邱弘道步於其東原寓舍之西嶺尋
幽而得之欣然以爲奇明日予兄子中與予俱往觀之方循崖
步嬉已脩然有濠濮間意及注視水鏡溶溶若空乃解冠振衣
浴於大窪時暑溽方蘊水落崖半時時小魚跳擲空明仰捫絕
壁不見日影笑語響答如在盎中四人者皆樂而忘歸焉予弟
野爲予言始來游時蓋探足而復卻者數四毛髮森豎有戒心
焉弘道又言其下有小窪深可沒脰而弗之及意或有神物居
之蓋不可知也予以爲是泉之出也久矣有灌注流演之利無

道藏輯要

天下名山記
江西窪泉劉

三

軫集三
X一丈

機械激決之勞徒爲巖谷之所掩伏草莽之所蒙翳蛇蟲魚鳥
牛馬之所憑聚而飲踐宜過者掉臂不顧也然堰之防之遏抑
沮尼使不得遂其安流邁往之志乃委伏頓折匿迹於幽遐寂
寞之濱至哀鳴怒號漂觸沙石而不已亦可悲矣抑古者窪尊
而杯飲茲泉合尊疊之體有窪之義焉請名之曰窪泉且將作
亭其上余兄弟日與賓客游詠於斯以滌其壅滯廓其清明而
庶幾相忘於太古淳龐之理不亦可乎